

ARTE SORKUNTZARAKO DIRU-LAGUNTZAK 2019.

OINARRIAK

I. XEDEA.

1. artikulua.- Xedea.

Deialdi honen helburua da Hernaniko artistei sorkuntza prozesuetan laguntzeko diru-laguntzak eskatzeko eta emateko prozedura arautzea.

Diru-laguntza horiek sorkuntza- eta ekoizpen-prozesuak garatzeko jarduera-proiektuak bultzatzeko helburua dute, betiere arte-adierazpenen berrikuntzara, sortzaileen babesera, parte-hartzera eta tokiko ingurunearekiko harremanera bideratuta.

Sorkuntzarako diru-laguntza deialdia urtero egingo da, bi urtez behin arte plastikoak eta gainerako arte-adierazpenak tartekatuz.

2019ko deialdian, jarduera-proiektu horiek kultura- edo sormen-sektorearen batean sartuta egon beharko dute: zinema eta ikus-entzunezkoak, argazkia, dantza, literatura, musika, antzerkia ... (plastikoak izan ezik).

Diru-laguntza hauen helburua da sortzaileei beraien obra sortu eta gauzatzeko laguntza ekonomikoa ematea.

2. artikulua.- Ezargarri den araudia.

Diru-laguntza hauek ematerakoan, eta onuraduna eta erakunde emailea elkarrekin lotuko dituen harreman juridikoa finkatzerakoan, oinarri hauek eta diru-laguntzak ematen direnean indarrean diren arauak bete beharko dira.

Oinarri hauetan aintzat hartu ez diren kontu guztietarako, Diru-laguntzei buruzko azaroaren 17ko 38/2003 Lege Orokorrak (EAO, 2003-11-18koa) eta Lege hori garatzeko 887/2006 Errege Dekretuaren bidez onartutako Arautegiak diotena hartuko da kontuan.

3. artikulua.- Onuradunak.

Diru-laguntza hau lor dezakete kultur eremuren batean diharduten edo hasi nahi duten pertsona fisikoek zein elkarteek.

Horretaz gain, eskatzaileak nahitaez egiaztatu beharko du, diru-laguntza eskatzeko datan, adin nagusikoa dela.

Ezingo dira diru-laguntzaren onuradunak izan Azaroaren 17ko 38/2003 Diru-laguntzetako Lege Orokorraren 13.2 artikuluan jasotako egoeraren batean dauden pertsona edo entitateak.

II. ESKAERAK

4. artikulua.- Eskabideak aurkeztea.

Laguntza horiek jaso nahi dituztenek deialdian zehaztutako ereduaren araberrako eskabide-eredu ofiziala

bete eta aurkeztu beharko dute.

Eskaerak Hernaniko Udalaren HHZ bulegoan aurkeztuko dira, astelehenetik ostiralera 08:00etatik 19:00ak bitartean eta hileko lehen eta hirugarren larunbatetan, berriz, 10:00etatik 13:00etara.

Eskaera kopurua:

Eskatzaile bakoitzari gehienez ere proiektu baterako laguntza emango zaio.

Aurkeztu beharreko agiriak:

Eskaera-orriarekin batera, agiri hauek aurkeztu beharko dira:

A) PARTE-HARTZAILE GUZTIEK AURKEZTU BEHARREKO DOKUMENTAZIOA

1. Eskaera-orri ofiziala, behar bezala beteta.
2. Eskatzailearen edo/eta ordezkariaren Nortasun Agiriaren kopia. Elkartea bada, IFKren kopia.
3. Proiektuaren memoria laburra, gehienez bi orrialde; bertan zehaztu behar da garatu beharreko proiektu artistikoa.
4. Garatzeko epea zein den. Epe hori gehienez bederatzita hilabetekoa izango da.
5. Artistaren edo/eta elkarteren Curriculum Vitae-a, kultur arloan izandako lan-eskarmentuari mugatutakoa.
6. Proiektuaren gastu eta diru-sarreraren aurrekontu zehatza (I. Eranskina). Aurrekontua orekatua izango da, hau da, diru-sarreraren eta gastuen kopuruak berdinak izango dira, eta diru-sarreraren atalean eskatzen duen diru-laguntzaren kopurua jarri beharko da. Aurrekontua egiterakoan kontuan izango dira: produkzio gastuak, materiala, makinaria alokairua, artistaren soldata...
7. Hernanin erroldatuta dagoela ziurtatzen duen agiria; elkarteen kasuan, Hernanin erregistratuta dagoela dioen agiria (ez da nahitaezkoa); edo Hernanin bere jarduera artistikoa garatzen duela ziurtatzen duen agiria. Hernaniko artista/eragiletzat hartuko da Hernaniko testuinguruan jarduten duena.

B) ONURADUN HAUTATUTAKOEN AURKEZTU BEHARREKO DOKUMENTAZIOA

1. Kontu korrontearen titularitatea egiaztatuko duen agiria.
2. Proiektuak hala eskatzen duenean, beharrezkoak izan daitezkeen egilearen eskubideak errespetatuko direla adierazten duen zinpeko aitortza.
3. Aurkeztutako proiektua lehenagotik eginda ez dagoela adierazten duen zinpeko aitortza.
4. Administrazioarekin Gizarte Segurantzako eta Zerga-bidezko betebeharrak egunean dituela egiaztatzea. Diru-laguntza eskaeraren zenbatekoak 3.000 €-ko kopurua gainditzen ez badu, nahikoa izango da horri buruzko zinpeko aitortza aurkeztea.
5. Zinpeko adierazpena, beste diru-sarrera batzuk badauden edo/eta beste erakunde batzuetan diru-laguntza eskatu duen adierazten duena.
6. Eskatzaileak onuradun izateko ezintasun egoerarik ez duela adierazten duen lekukotasuna, ziurtagiria edo, hala badagokio, ardurapeko aitortza.
Agiri horiek Administrazio Publikoaren Administrazio Prozedura Erkidea arautzen duen urriaren 1eko 39/2015 Legearen 16.4. artikuluan zehaztutako eran ere aurkeztu ahal izango dira.

Onuradunak dokumentazioa aurkeztuko ez balu edo berau egokia ez balitz, zerrendan hurrengoa gelditu

den proiektuari emango zaio diru-laguntza.

Eskariak aurkezteak deialdi honetan jasotako baldintza guztiak onartzen direla esan nahi du.

Aukeratu gabeko lanak itzuli egingo dira, eta egileek edo horien ordezkariak jaso ahal izango dituzte, epaia ezagutzera eman osteko hilabetean. Horrela egin ezean, apurtu eta bota egingo dira.

Erakunde antolatzailea ez da arduratuko itzultzean galtzen diren lanez edota kopiez.

5. artikulua.- Eskariak aurkezteko epea.

Eskaerak aurkezteko epea hilabetekoa izango da, GAOn argitaratu eta hurrengo egunean hasita.

6. artikulua.- Akatsak zuzentzea.

Eskaerak edo harekin batera aurkeztu beharreko dokumentazioak akatsen bat baldin badu edo osatu gabe baldin badago, eskatzaileei hamar laneguneko epea emango zaie, jakinarazpena jasotako egunaren biharamunetik hasita, aurkitutako hutsak konpon ditzaten. Emandako epea amaitutakoan akats horiek konpondu gabe baleude, eskaera bertan behera utzi dutela ulertuko da, eta prozedura artxibatu egingo da, 39/2015 Legearen 68.1 artikuluan xedatutakoarekin bat ebazpena eman eta gero.

7. artikulua.- Baztertuak.

Balioespen batzordeak eskumena izango du, kasuz kasu, diru-laguntza eskaera bat deialditik kanpo uzteko, betiere irizpide hauek kontuan izanik eta behar bezala arrazoitu ondoren.

Baztertuak izango dira, espresuki:

- Euskaraz ez den beste hizkuntza batean soilik aurkeztu diren proiektuak. Derrigorrezkoa da proiektua euskara hutsean edo elebitan aurkeztea.

- Era zuzenean edo zeharka indarkeria bultzatzen duten edota indarkeria motaren bati apologia egiten dioten proiektuak.

Era berean, modu orokorrean deialdi honen bidez lagunduko diren ekintzetatik kanpo geratuko dira honako jarduerak:

- Azaroaren 17ko 38/2003 Diru-laguntzetako Lege Orokorraren 13.2. eta 13.3. artikuluetan aurreikusitako egoeraren batean sartuak daudenak.

III. DIRU-LAGUNTZA EMATEA.

8. artikulua.- Aurrekontua.

Diru-laguntza hauek Hernaniko Udalaren aurrekontu propioetik finantzatuko dira. Deialdiak ezarriko du aurrekontuko zein kreditu zehatzen kontura finantzatuko diren.

9. artikulua.- Diru-laguntzen zenbatekoa.

Udalak diru-laguntza honi gehienez 10.000,00 € eskainiko dizkio.

Aurkezturiko proiektu bakoitzak gehienez 6.000,00 €-ko aurrekontua izango du, zerga guztiak barne hartuta.

Proposamen bat baino gehiago aukera litezke diru-partida bukatu arte.

Balioespen batzordeak erabakiko du zenbat diru-laguntza eman eta zenbatekoak.

Edozein kasutan, diru-laguntzaren zenbatekoa inolaz ere ez da izango -hura bakarrik hartuta edo beste Administrazio Publikoek, edo beste Erakunde publiko eta pribatuek emaniko laguntza edo diru-laguntza batekin batuta- onuradunak garatu beharreko jardueraren kostua baino handiagoa.

Diru-laguntzaren zenbatekoa, gehienez, diruz lagun daitekeen inbertsioaren balioaren % 100 artekoa izango da. Diru partidak ez badu onuradunari eskatutako diru kopurua emateko aukerarik ematen aurrekontua eta proiektua egokitzeko eskatuko zaio, egokitzapen hori egiteari uko egin diezaioke onuradunak.

10. artikulua.- Diru-laguntza ordaintzea.

Programa honen kontura pertsona fisikoei edo elkarteei emandako diru-laguntzari zerga araudian indarrean dauden zergak (PFEZ eta BEZ) aplikatuko zaizkio. Diru-laguntzak bi zatitan ordainduko dira:

- % 50 ebazpena onartzean, eta gainerakoa ekimena justifikatzeko dokumentazioa aurkezten denean.

Dena dela, salbuespen moduan, diru-laguntza eskaeraren zenbatekoak 3.000€-ko kopurua gainditzen ez badu, diru-laguntza emateko hitzarmen edo ebazpenean onartu ahal izango da proiektuaren justifikazioa eta jarduera egin aurretik egitea ordainketak, diru-laguntzaren helburu den ekimenak berekin lekartzakeen jarduerak egin ahal izateko.

Emandako diru-laguntza bankuko transferentzia bitartez ordainduko da, elkarte edo pertsona onuradunak adierazitako kontu korrontean.

11. artikulua.- Beste diru-laguntzekin bateragarritasuna.

Oinarri hauen arabera emandako diru-laguntzak helburu berarekin ematen diren beste diru-laguntzekin bateragarriak izango dira, betiere gain-finantziatorik ez balego.

IV. PROZEDURA.

12. artikulua.- Balorazio irizpideak.

Aurkeztutako proiektuak baloratzeko erabiliko diren irizpideak honako hauek izango dira:

- Aurkeztutako proiektuaren interesgarritasuna, kalitatea eta originaltasuna. 55 puntu.
- Hernaniko artista/eragilea izatea. Hernaniko artista/eragiletzat hartuko da Hernaniko testuinguruan jarduten duena. 10 puntu.
- Proiektuaren garatze prozesuan herriko eragile eta norbanakoen inplikazioa eskatuko duen proiektua izatea. 10 puntu.
- Proiektuaren bideragarritasuna. 25 puntu.

Diru-laguntzaren onuradunak pertsona bat baino gehiago direnean, sexu bakoitzetik bana izatea hobetsiko da, beti ere, egindako proposamen artistikoak onuraduna izateko kalitate nahikoa badu.

Elkarteen kasuan lehentasuna izango dute emakumez osatutako elkarteek edota emakume eta gizonen partaidetza orekatua duteneek, zein emakumeen parte-hartzea sustatzeko jarduerak, ildoak eta dinamikak

aurrera daramatzaten elkarteek.

13. artikulua.- Prozedura.

Gauzatzea eta proposamena.

1. Kultura Saileko talde teknikoari dagokio deialdi honetan aurreikusitako diru-laguntzak kudeatzeko lanak egitea.

2. Kide anitzeko balioespen batzorde batek aztertu eta ebaluatuko ditu eskaerak. Kultura delegatuak, Kultura batzordeko ordezkari bat eta arte munduko bi adituk osatuko dute, eta batzorde horrek prestatuko du ebazpen-proposamena.

Kultura batzordeko Lehendakariak izango du kalitate botoa, berdinketa kasuan.

3. Diru-laguntzen ebazpen proposamena edo behin-behineko ebazpenaren proposamena interesatuei jakinaraziko zaie, eta hamar eguneko epea emango zaie, egoki iritzitako alegazioak egiteko.

Jakinarazpen prozesuak sinpleago, azkarrago eta errazagoak izan daitezten, ebazpen-proposamena telefonoz jakinaraziko zaie eskatzaileei, bai eta udal jakinarazpenak eta dokumentazioa jasotzeko emandako posta elektronikoan ere.

4. Aurkeztutako alegazioak aztertu ondoren, behin betiko ebazpenaren proposamena egingo da; eta hor zehaztuko da diru-laguntza zein eskatzailei ematea erabaki den, eta diru-laguntzaren zenbatekoa. Diru-laguntza jasotzeko baldintzak betetzen dituzten eskatzaile guztiei emango zaie, eta beraz, behin-behineko zerrenden ebazpenaren aurka aurkeztutako alegazioak onartu egingo balira, behin betiko zerrendetako diru-kopuruetan aldaketak gerta daitezke.

5.- Adierazitako epean alegaziorik aurkeztuko ez balitz, behin-behineko ebazpen horrek behin betiko izaera hartuko du.

Ebazpena.

1. Behin betiko ebazpen proposamena onetsi ondoren, Organo eskudunak prozedura ebatziko du oinarrietan dioenaren arabera arazoitutako ebazpen baten bidez. Prozeduran egiaztatuta egon beharko dute ebazpenerako Organo eskudunak erabili dituen oinarriak.

2. Ebazpenean berariaz jakinaraziko da gainerako eskaerak gaitzetsi egin direla, beste eskaerarik balego, behintzat.

3. Ebazpena erabaki eta jakinarazteko gehienezko epea sei hilabetekoa izango da, diru-laguntzen deialdia argitaratzen den egunetik hasita. Aipatutako epean ebazpenik ez balego, aurkeztutako eskaera atzera bota dela adierazi nahiko du.

4. Ebazpenean diru-laguntzaren zenbatekoa eta ordainketa zehaztuko dira.

V. DIRU-LAGUNTZEN KONTROLA.

14. artikulua.- Onuradunen betebeharrak.

Edonola ere, onuradunak betebeharrak hauek izango ditu:

1. Jarduera egitea diru-laguntza emateko oinarrietan jasota dagoen moduan.
2. Jarduera egiten ari dela frogatzea, halaber, laguntza emateko edo horretaz gozatzeko bete beharreko eskakizunak eta baldintzak betetzen dituela.
3. Diruz lagundutako jarduera gauzatzeko behar diren baimen guztiak eskuratzea, eta horietan ezarritakoa betetzea.
4. Onuradunak bere sorkuntza-lana jendaurrean aurkeztuko du Hernanin eta euskaraz. Aurkezpen horretarako eguna eta lekua kide anitzeko balioespen batzordea eta artistaren/eragilearen artean zehaztuko da.
5. Diruz lagundutako jarduera gauzatzeko garaian sortzen diren hondakinak modu egokian kudeatu beharko dira; hau da, gaika sailkatu beharko dira eta horretarako aurreikusita dauden guneeetan edota edukiontzietan utzi.
6. Trabarik ez jartzea, Hernaniko Udalak jarduerari jarraipena egin nahi izanez gero.
7. Jasotako diru-laguntza itzuli beharko du onuradunak, laguntza hori emateko ezarritako baldintzak ez baditu betetzen, edota jasotako diru-kopurua gauzatu duen jardueraren kostua baino handiagoa bada.
8. Onuraduna behartuta dago espedientea izapidetzen ari den departamenduak, udal kontu-hartzaileak, Herri Kontuen Euskal Epaitegiak edo beste organo eskudunen batek eskatutako informazioa ematera.

15.- artikulua. Diruz laguntzeko gastuak.

1. Diruz lagun daitezkeen gastuak hauek dira: diruz lagunduko den jarduerari dagozkionak eta oinarri hauetan ezarritako epean egiten direnak. Diruz lagundutako elementuen erosketa kostuak ezin dezake inoiz merkatuko balioa baino handiagoa izan.

16.- artikulua. Zuriketa.

Modu orokorrean, oinarri hauen xede diren diru-laguntzak egiaztatzeko, agiri hauek aurkeztu beharko dira:

- a) Jardueraren inguruko memoria. Bertan diru-laguntza ematean jarritako baldintzak bete direla frogatuko da, zer jarduera egin diren eta zer emaitza lortu diren.
- b) Jardueran izandako gastu eta inbertsioen zerrenda sailkatuta. Adierazi beharko dira: hartzailea, Identifikazio Fiskaleko Kodea edo Nortasun Agiria, zenbatekoa (BEZ barne) eta faktura egiteko eguna.
- c) Diruz lagundutako jarduera bestelako diru-sarrera edo laguntzen bidez finantzatzen bada, zerrenda xehatua, zenbatekoa eta jatorria.
- d) Diruz lagundu den jarduera egin dela egiaztatzen duen dokumentazio grafiko edo ikus-entzunezkoa egiaztapen eta lekuko gisa baliagarri izango dena. Horretarako, Udalak erabakiko du zein froga-agiri eskatu onuradunari, honek entregatzeko.

Agiriak aurkezteko epea:

Artikulu honetan zerrendatutako egiaztagiriak sorkuntza lana bukatu eta 15 eguneko epearen barruan aurkeztuko dira.

Diru-laguntza egiaztatzeko ezarritako epea igarota, onuradunak ez baldin badu aurreko atalean aipatutako

dokumentazioa aurkeztu, diru-laguntza ezetsi egingo da, edota jasotako diru-kopurua itzuli egin beharko du.

VI. ARGITARA EMATEA.

17. artikulua.

Emandako diru-laguntzen zerrenda, onuradunen izen-abizenekin eta emandako kopuruekin, Udalaren web orrian eta iragarki-oholean argitaratuko da, eta balegokio, Gipuzkoako Aldizkari Ofizialean ere bai.

Diru-laguntzen datuak ez dira argitaratuko, baldin eta datuak argitaratzea pertsona fisikoen ohorearen errespetu eta babesaren nahiz intimitate pertsonal zein familiarren aurkakoa denean.

VI. OINARRIEN INTERPRETAZIOA.

18. artikulua.

Oinarri hauen interpretazioaren harira sor daitekeen edozein zalantza Udalak erabakiko du.

Oinarri espezifikoa hauean jasotzen ez diren gai guztietan Diru-laguntzen gaineko 38/2003 Lege Orokorrean ezarritakoa aplikatuko da, eta baita bat datozen gainerako lege arauetan ezarritakoa ere.

VII. HELEGITEAK.

Oinarri hauen aurka berraztertzeko errekurtsua jarri ahal izango da hilabeteko epean deialdia onartu duen organo eskudunaren aurrean, edo zuzenean aurka egin ahal izango zaio bi hilabeteko epean Administrazioarekiko Auzien Epaitegiaren aurrean. Epeak, betiere, oinarri hauek argitaratutako egunaren biharamunetik hasiko dira zenbatzen.